

Date – 16/06/2025
Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Hortoki leh Sairang inkar rel kawng him leh him loh endikna report chu thuneitute hnenah thehluh a ni tawh.
2. Power & Electricity department hnathawkte chuan metre box kal tlang lova electric pawt chhungkaw engemaw zat an hmuchhuak.
3. Cyprus-a cham mek Prime Minister Narendra Modia leh Cyprus President Nikos Christodoulides te vawiinah an inkawm dawn.
4. Israel-in sipai chakna hman mek a tihtawp chuan Iran in inkahhai puan a remti.

<><><>

RAILWAYS

Hortoki leh Sairang inkar rel kawng him leh him loh endikna report chu thuneitute hnenah thehluh a ni tawh.

Rel tlanna atana rel kawng a him leh him loh endiktu Commissioner of Railway Safety (CRS) Northeast Frontier Circle Pu Sumeet Singhal chuan Hortoki leh Sairang/Sihhmui rel chawlhmun inkara rel kawng siam thar him leh him loh a endikna report chu tun hnai khan Ministry of Railways-ah a thehlut a, Ministry of Railways pawmpuina nghah mek a ni. Northeast Frontier Railway (NFR) thupuangtu Chief Public Relations Officer (CPRO) Pu Kapinjal Kishore Sharma-a'n Akashvani Aizawl a hrilh danin June ni 6 leh ni 10 inkar (ni 5 chhung) khan CSR Pu Sumeet Singhal hian Hortoki leh Sairang rel chawlhmun inkar a rel kawng siam thar hi a him tawk leh tawk loh a endik a. A endikna report chu a endik hna zawh fel tuk Nilaini (June ni 11) khan Ministry of Railways-ah a thehlut a. Report hi pawm thuai a nih an beisei thu Pu Kapinjal Kishore Sharma chuan a sawi a. Pawm a nih hnu chuan rel hi Bairabi atangin Aizawl khawpui daifem Sairang/Sihhmui rel chawlhmun thlengin a lo lut tawh dawn a ni.

He tianga rel kawng siam thar a him tih finfiah a nih a, rel a tlan hnu chuan June thla chhung a nih loh pawhin July thla hi chuan hawn a ni tawh dawn niin NFR thuneitute chuan an sawi a. Prime Minister emaw Railways Minister-in emaw a hawng tura ngaih a ni.

Nikum July thla chawhnu lam khan CSR Pu Sumeet Singhal tho hian Bairabi leh Hortoki inkar rel kawng siam zawh hlim a him leh him loh hi a lo endik tawh a. Nikum vek August thla bul lam khan a him tawk tih report a thehluh chu Ministry of Railways chuan a lo pawmpui tawh a. Hortoki leh Sairang inkar rel kawng siam hna hi Sairang bula lei dawh lai a chim avangin a khaw tlai ta a. Tun thla-ah endik leh theihin an peih ta chauh a ni.

Bairabi leh Sairang inkar rel kawng hi kilometre 51.38 a thui a ni a, mihring leh bungraw phur rel Mizoram a lut hian state sum leh pai dinhmun mai bakah mihring leh bungraw kal kual vel a ti danglam dawrh tura ngaih a ni a. Northeast Frontier Railway siam Bairabi–Sairang rel kawng thar hi kilometre 51.38 a thui a ni a, hmun 4-ah then niin, Bairabi leh Hortoki rel chawlhmun inkar km 16.72 a thui, Hortoki leh Kawnpui inkar km 9.71 a thui, Kawnpui leh Mualkhang inkar km 12.11 a thui leh Mualkhang leh Sairang inkar km 12.84 a thui a ni a. Leiverh 48, lei (bridge) lian 55, lei te 87, Road Over Bridges 5 leh Road Under Bridges 6 a awm bawk a ni.

Inrinni khan Sairang VC Gram Sabha hun hmanna-ah Mizorama Rel lo lut hnai mai tur a nih avangin, mipui mimir ten fimkhurna chang hriat tawk loh avanga Rel kawnga chetsualna a thlen loh na’n rel kawng himna chungchang inzirtirna 'Railway Safety Awareness Campaign' kalpui a ni a. He Awareness campaign-ah SDC Pu Samuel Malsawmzuala, Sairang Police station OC Pu Lalngaihawma, Asstt. Executive Engineer NF Railway Aizawl Pu Partha Pratima Das leh Sr. Section Engineer, NFR Aizawl Pu Ganesh Langthasa te’n Sairang mipui te hnenah mipui himna atana hriattur pawimawh zirtirna hun an hmang a ni.

<><><>

11 YEARS OF PM MODI’S GOVT. (TOURISM)

Prime Minister Narendra Modi kaihhruai sorkar kum 11 chhunga hmalakna hrang hrang zingah Mizoramah pawh zinmite hip kawngah ruahmanna engemaw zat siam mek a ni.

Tourism director Pi R. Lalrodingi’n Akashvani Aizawl a hriih danin Prime Minister Narendra Modi kaihhruai NDA sorkar hian tun hnai khan zinmite Mizoram a hip theihna tur kawng chi khat atan Unity Mall (Ekta Mall) buatsaih a nih thu a sawi a. Aizawl Chawnpui venga Printing & Stationery ramah Unity Mall hi sak tura ruahman a ni a, hemi atan hian sorkar laipui chuan cheng vaibelchhe 127 hmuh a ni tawh a, ruahmanna kalpui mek a ni, a ti. Hei bakah hian zinmite hip pawimawhna hi inzirtir a tul hle ni a hriat a ni a, hei pawh hi kalpui tan mek a ni, a ti a ni.

Sorkar laipui ruahmanna hnuai-ah tho hian Jan Dhan hmanga sum leh pai a mipui huapa thil kalpui hna (financial inclusion) pawh chak takin Mizoramah kalpui a ni a. He ruahmanna hnuai-ah hian bank account nuai 4 hawn a ni tawh a, an zinga a tam zawk, za zela 53 zet chu hmeichhia an ni. PM Mudra Yojana hnuaiah pawh cheng vaibelchhe 2,635 ruahmanin tlangmi leh hnam hnufual leh hmeichhia mi nuai 1, sing 5 leh sang 8-te chu kawngkama an sumdawn theihna tur ruahmansak an ni bawk a ni.

<><><>

POWER THEFT

Power & Electricity department hnathawkte chuan metre box kal tlang lova electric pawt chhungkaw engemaw zat an hmuchhuak.

Power & electricity department hian kar kalta Thawhtanni (June ni 9) atang khan electric pawttute endik hna hi an kalpui tan a. Metre box kal tlang lo leh eng chhit man chawi lova electric pawt ru engemaw zat an hmuhchhuah bakah eng an neih reng theihna atana veng dang electric lo pawt kawp an hmuchhuak nual bawk. He tiang hi dan kalh a nih avangin an chhui-in an endik chhunzawm zel dawn niin Power & Electricity department hotute chuan an sawi a. Electric hman man chhun luh a tlem phah bakah electric pek chhuah lamah harsatna nasa tak siam thei a nih avangin man chawi lova electric pawt ru leh metre box kaltlang lova lo hmangete hi zawnchhuah zel an tum thu an sawi a. Tunah hian kawlphehtha pawh ruk chungchang hi endik chhunzawm zel a la nih avangin metre box kaltlang lova pawtru leh dan bawhchhetu dangte hi a zat chiah an la hriat theih rih loh thu Power department hotute chuan an sawi a ni.

Veng dang power line lo pawt kawp zingah an kawlphehtha hman man zep then an awm lai-in zep then loh pawhin a hlauhawm hrim hrim ni-in an sawi a. Engemaw palhah kangmei hial pawh chhuak thei a nih thu an sawi.

<><><>

MUHCS

Mizoram Universal Health Care Scheme bultan atanga thla 2 hnuah inziak lut an la tam lo hle a, June ni 6 thlenga chhinchhiah danin MUHCS-a inziak lut hi chhungkua 5,159 an ni.

Mizoram Health Care Society chhinchhiah danin kumin April ni 1 atanga bultan Mizoram Universal Health Care Scheme (MUHCS)-ah hian chhungkaw 5,159 chiah inziak lut an awm a. Sorkar thuchhuah tarlan danin online leh offline inziah luh hi June thla chhung hawn tur niin hemi chhunga inziak lut hman lo tan August thla-ah late fee chawiin a inziah luh leh theih dawn a ni. Sorkar thuneitute tarlan danin tun dinhmunah MUHCS hmang tangkai mi 8,245 an awm tawh a, heng zingah hian damlo 655 te chu phai lama refer an ni a, June ni 6 thlenga chhinchhiah danin MUHCS hnuaia damdawiin inziak lutte hian sawrkarah cheng vaibelchhe 9 sing 2 sang 4 an hmu let tawh a ni.

Sawrkar liam ta MNF kaihhruai sawrkarah khan Mizoram State Health Care Scheme hnuaiah hian kum 2024 leh 2025 inkarah mi 49,935 an inziak lut a, kum 2023 atanga 2024 inkarah mi 26,569 inziak lutin heng ten nena khaikhin chuan tuna Mizoram Universal Health Care Scheme hman mekah hian inziak lut an la tlem hle a. Mahse, thuneitute sawi danin MUHCS ah chuan PM-JAY leh Civil pensioner te a hranpaa inziah luh vek a ngaih thu an sawi a, MSHCS ah chuan a ruala ziah luh vek an ni thung tih an sawi a ni.

Sawrkar chhinchhiah danin tun dinhmunah Ayushman Bharat Pradhan Mantri Jan Arogya Yojana (PM-JAY) hnuaia inziak lut Golden Card nei mi nuai 5 sing 8 an awm mek a, MUHCS erawh Private damdawiin tam zawkah a hman theih loh avangin tun dinhmuna inziak lut an la tlem chhan ni a ngaih niin sawrkar chuan hemi kawngah hian nasa takin hma a la, tunah hian Mizoram pawna mimal enkawl damdawiin ziahluh (empanelled private hospital) 27 a awm mek a ni.

Mizoram Universal Health Care Scheme hi cheng nuai 5 thleng a thlawna in enkawl theihna tura ruahman a ni a, sawrkar chuan damlo enkawlna man hi cashless vek tura ruahman in inziah luh man hi cheng 2500, cheng 5000 man te leh cheng sing 1 man te a awm hrang a ni.

<><><>

ASF UPDATE

Inrinni khan African Swine Fever (ASF) hri leng avanga vawk thi leh suat a awm loh lai-in nimin khan Siaha district-ah vawk 10 a thi a, suat erawh chu a awm lo.

Animal husbandry & veterinary department hotute chuan tun hnai-ah hian ASF vawk pulhri avanga vawk thi leh suat hi a awm pawhin a tlem hle niin an sawi a, vawk thi leh suat awm loh ni a awm fo bawk niin an sawi. Chutih lai chuan ASF vawk pulhri hi Lunglei khawpui leh Mamit district a Zawlnuam khua bak thingtlang lama a la darh loh lai-in Siaha leh Lawngtlai-ah chuan district hmunpui bakah thingtlang khaw lamah a darh viau tawh a. District dangah chuan a la darh lo ni a thu dawn a ni. Tun dinhmunah hian kumin chungin ASF vawk pulhri avangin vawk 4,775 a thi tawh a, nimin thlengin khua leh veng 69 chu vawk pulhri lenna a a puan a ni tawh. Vawk pulhri a darh zel lohna atan vawk 1,497 suat a ni tawh bawk.

Kuminah hian vawk pulhri avangin Siaha district-ah vawk a thi hnem ber tawh a, vawk 2,768 a thi tawh a, vawk 900 suat a ni tawh bawk a. Lawngtlai district-in a dawt a, vawk 1,669 thi tawhin 391 suat a ni tawh bawk. Lunglei khawpui-ah vawk 168 thi tawhin 158 suat a ni tawh a. Mamit district a Zawlnuam khua-ah vawk 173 thi tawhin vawk 48 suat a ni tawh bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Vawiinah Prime Minister Narendra Modia leh Cyprus President Nikos Christodoulides te an inkawm dawn a. Ram pathum tlawh tura zin Prime Minister Narendra Modia chuan a hmasa ber atan nimin khan Cyprus a thleng a. Pu Modia hian Larnaka International Airport ah Cyprus President Nikos Christodoulides chuan a lo hmuak a. Tun tum hi kum 20 hnua India Prime Minister-in Cyprus a tlawh leh hmasa ber a ni. Pu Modia hian India mite khawsak tamna Lemesos pan nghalin mipui tam takin an lo lawm a. President Christodoulides nen sumdawnna lama inhmukhkhawmnaah an tel nghal a. Vawiin hian sawrkar aiawh te nen an inbia ang a. Sumdawnna, zirna, digital lama thawhdunna leh venhimna chungchangte an sawiho ang. PM Modia hian Cyprus a tlawh hnu hian Croatia leh Canada a pan leh ang.

<><><>

MAHARARTRA

Maharastra-a Indrayani lui chung a lei dawh chimah mi pali an thi. Vanduaaina thlenna hmun hi Pune-a Kundmala ah a ni a. Lei chimah hian khualzin engemawzat luiah an tla nia hriat a ni a. Ruang pali lakchhuah tawh niin mi parukin hliam an tuar a. Mi 38 chhanchhuah tawh an ni.

State sawrkar chuan mitthi chhungte chu cheng nuai 5 theuh zangnadawmna pek an ni ang tih a puang.

<><><>

ISRAEL IRAN

Israel-in sipai chakna hman chhunzawm a tihtawp chuan Iran in inkahhai puan a remti. Hetihlai hian Iran in Israel a chhanlet nana Inrinni zan leh Pathiannia missile hmanga a beihnaah mi 10 an thi tawh a. An zingah hian naupang pawh an tel nia thudawn a ni a.Mi 200 chuangin hliam an tuar a ni.

Iran foreign Minister Abbas Aragchi chuan Tehran ini buaina tih sosan a duh loh thu a sawi a ni.

<><><>